

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine na 48. sjednici Predstavničkog doma, održanoj 18. marta 2009. godine i na 28. sjednici Doma naroda, održanoj 27. aprila 2009. godine, usvojila je

ZAKON

O IZMJENAMA I DOPUNAMA ZAKONA O DRŽAVNOJ SLUŽBI U INSTITUCIJAMA BOSNE I HERCEGOVINE

Član 1.

U Zakonu o državnoj službi u institucijama Bosne i Hercegovine ("Službeni glasnik BiH", br. 12/02, 19/02, 8/03, 35/03, 4/04, 17/04, 26/04, 37/04, 48/05, 2/06 i 32/07), u članu 1. stav 1. riječi: "institucijama Bosne i Hercegovine (u daljnjem tekstu: Institucija)", zamjenjuju se riječima: "ministarstvima, samostalnim upravnim organizacijama i upravnim organizacijama u sastavu ministarstava, kao i drugim institucijama Bosne i Hercegovine osnovanim posebnim zakonom ili kojima je posebnim zakonom povjereno obavljanje poslova uprave (u daljnjem tekstu: institucije)".

Iza stava 2. dodaje se novi stav 3. koji glasi:

"3. Izrazi napisani samo u muškom rodu odnose se podjednako na muški i ženski rod, dok će se u označavanju funkcija, zvanja i titula upotrebljavati gender senzitivni jezik."

Član 2.

U članu 3. stav 1. tačka e) mijenja se i glasi:

"e) profesionalnost i nepristrasnost".

Član 3.

U članu 14. stav 4. tačka b) riječi: "Zakonom o slobodi pristupa informacijama u Bosni i Hercegovini ("Službeni glasnik BiH", br. 28/00)" zamjenjuju se riječju "zakonom".

Stav 5. mijenja se i glasi:

"5. Državni službenik dužan je da se ponaša i postupa u skladu s Kodeksom državnih službenika, koji usvaja Vijeće ministara, na prijedlog Agencije."

Član 4.

U članu 15. stav 1. tačka d) riječi: "u Poglavlju V. ovog zakona" zamjenjuju se riječima: "posebnim zakonom".

Stav 3. mijenja se i glasi:

"3. Vijeće ministara donosi propis kojim regulira uslove i način zaštite fizičkog i moralnog integriteta državnog službenika u vršenju dužnosti, uključujući i propisivanje prekršaja u slučaju povrede ovog propisa."

Član 5.

U članu 19. stav 1. mijenja se i glasi:

"1. Ako u instituciji postoji upražnjeno mjesto koje se ne može popuniti internim premještanjem državnog službenika zaposlenog na sličnom radnom mjestu u instituciji, institucija može, u skladu s aktom iz člana 32. stav 4. ovog zakona, prvo interno oglasiti to mjesto."

U stavu 2. u prvom redu iza riječi "sa" dodaju se riječi: "članom 32. stav 4. ili", a riječ "prekobrojnog" zamjenjuje se riječju "državnog".

U stavu 4. riječi: "nadležnosti koje su do tada obavljali entiteti" zamjenjuju se riječima: "određene nadležnosti", a riječ "otvorenog" briše se.

Član 6.

Iza člana 21. dodaje se novi član 21a. koji glasi:

"Član 21a. Poništenje oglasa

Objavljeni oglas Agencija može poništiti na obrazložen zahtjev institucije najkasnije do dostavljanja rezultata izbornog procesa, odnosno liste uspješnih kandidata Agenciji, pri čemu se ista radna mjesta ne mogu ponovo oglašavati u periodu od jedne godine od dana objavljivanja oglasa."

Član 7.

U članu 22. stav 1. tačka c) iza riječi "spreme" dodaju se riječi: "odnosno visoko obrazovanje prvog, drugog ili trećeg ciklusa Bolonjskog sistema studiranja, što se utvrđuje propisom kojim se reguliraju poslovi osnovnih djelatnosti i pomoćno-tehnički poslovi i uslovi za njihovo obavljanje u organima uprave institucija Bosne i Hercegovine."

Tačka e) mijenja se i glasi:

"e) da nije navršilo zakonski propisanu starosnu dob za penzionisanje, odnosno da nije ostvarilo pravo na ličnu penziju po bilo kojem osnovu."

Iza tačke e) dodaje se nova tačka f) koja glasi:

"f) da su prema njemu prestale pravne posljedice presude za krivično djelo nasilja u porodici, izrečene pravosnažnom sudskom presudom, u skladu s krivičnim zakonima."

Dosadašnje tačke f), g) i h) postaju tačke g), h) i i).

U dosadašnjoj tački f) koja je postala tačka g) iza riječi: "disciplinske mjere na bilo kojem nivou vlasti u Bosni i Hercegovini" dodaje se zarez i riječi: "odbijanja polaganja zakletve, samovoljnog napuštanja državne službe ili davanja neistinitih i netačnih podataka prilikom prijema u državnu službu," a riječi: "u "Službenom glasniku Bosne i Hercegovine"" brišu se.

U dosadašnjoj tački g), koja je postala tačka h), riječi: "imati uvjerenje" brišu se.

Član 8.

U članu 24. iza stava 3. dodaju se novi st. 4. i 5. koji glase:

"4. Članovi komisije imaju pravo na naknadu za svoj rad koju utvrđuje i isplaćuje Agencija.

5. Prilikom imenovanja posebnih komisija za izbor Agencija vodi računa o ravnopravnoj zastupljenosti spolova."

Član 9.

U članu 25. u nazivu i cijelom tekstu člana riječ "diskvalifikacija" zamjenjuje se riječju "izuzeće" u odgovarajućem padežu.

Stav 3. mijenja se i glasi:

"3. Svaki prijavljeni kandidat ima pravo najkasnije do momenta pristupanja stručnom ispitu podnijeti zahtjev za izuzeće bilo kojeg člana ili komisije za izbor Odboru državne službe za žalbe (u daljnjem tekstu: "Odbor"), iz razloga:

- a) utvrđenih u članu 16. ovog zakona;
- b) očiglednog rizika od predrasuda i pristrasnosti;
- c) nedostatka adekvatnog stručnog znanja i iskustva.

Iza stava 3. dodaje se novi stav 4. koji glasi:

"4. Odbor je dužan po zahtjevu za izuzeće odlučiti u roku od osam dana od dana prijema zahtjeva."

Dosadašnji stav 4. postaje stav 5.

Član 10.

U članu 27. stav 1. rečenica: "Takav javni konkurs održava se najmanje 30 dana nakon krajnjeg roka za prijave." briše se.

Član 11.

U članu 28. stav 3. riječi: "st. 1. i" zamjenjuju se riječju "stava", riječ "njihova" briše se, iza riječi "prijema" dodaju se riječi: "mišljenja Agencije i liste uspješnih kandidata", a riječi: "postaviti, odnosno" brišu se.

Iza stava 7. dodaje se novi stav 8. koji glasi:

"8. Ako postavljeni državni službenik neopravdano ne preuzme dužnost, organ koji je izvršio postavljenje poništiti će rješenje o postavljenju u roku od 15 dana od dana predviđenog za preuzimanje dužnosti, i u tom slučaju se to lice suspendira od učešća na javnim konkursima za zapošljavanje državnih službenika u institucijama u periodu od dvije godine od pravosnažnosti akta o poništenju."

Član 12.

Iza člana 28. dodaje se novi član 28a. koji glasi:

"Član 28a.
Zapošljavanje na određeno vrijeme

1. Ako u instituciji postoji upražnjeno radno mjesto državnog službenika koje je u skladu s potrebama rada neophodno hitno popuniti, a interna popuna radnog mjesta nije moguća, institucija može to radno mjesto popuniti zapošljavanjem lica u skladu sa Zakonom o radu u institucijama Bosne i Hercegovine u statusu zaposlenika.
2. Radni odnos na određeno vrijeme može trajati najduže devet mjeseci, osim u slučaju bolovanja ili porodiljskog odsustva državnog službenika, ali ne duže od dvije godine.
3. Institucija je obavezna zatražiti od Agencije saglasnost za popunu radnog mjesta u skladu sa stavom 1. ovog člana, a Agencija je dužna dostaviti odgovor najkasnije u roku od osam dana od dana prijema zahtjeva.
4. Odredbe ovog člana ne odnose se na rukovodeće državne službenike."

Član 13.

U članu 29. stav 3. tačka b) mijenja se i glasi:

"b) nezadovoljavajuća, institucija razrješava dužnosti državnog službenika, kojem prestaje radni odnos bez prava na otpremninu. Protiv rješenja o razrješenju državni službenik ima pravo podnijeti žalbu Odboru u roku od osam dana od dana prijema rješenja."

Stav 4. mijenja se i glasi:

"4. Izuzetno od stava 3. ovog člana, rukovodilac institucije na obrazložen zahtjev državnog službenika može produžiti probni rad za još šest mjeseci."

Član 14.

U članu 30. stav 3. riječi: "na prijedlog organa nadležnog za postavljenje" brišu se.

U stavu 4. riječi: "organa nadležnog za postavljenje" zamjenjuju se riječima: "posebne komisije koju Vijeće ministara imenuje u skladu s propisom o ocjenjivanju državnih službenika".

U stavu 5. riječi: "dvanaest mjeseci" zamjenjuju se riječima: "šest mjeseci".

Član 15.

U članu 31. stav 1. riječi: "isključivo putem javnog konkursa" zamjenjuju se riječima: "putem internog ili javnog konkursa".

U stavu 2. iza riječi "zakona" dodaju se riječi: "odnosno viši unutrašnji platni razred", riječi: "organ nadležan za njegovo postavljenje" zamjenjuju se riječju "institucija" i dodaju se riječi: "u skladu s propisima o plaćama i naknadama zaposlenih u institucijama Bosne i Hercegovine".

Član 16.

U članu 32. naslov člana mijenja se i glasi: "**Interni i eksterni premještaji**".

Stavovi 1. i 2. mijenjaju se i glase:

"1. Interni premještaj državnog službenika na slično radno mjesto u skladu s potrebama službe vrši rukovodilac institucije.

2. Eksterni premještaj državnog službenika na slično radno mjesto u drugoj instituciji, u skladu s potrebama rada, na prijedlog, odnosno uz saglasnost rukovodilaca institucija, vrši Agencija."

Stav 3. briše se, a dosadašnji stav 4. postaje stav 3.

U dosadašnjem stavu 4. koji je postao stav 3. iza riječi "internih" dodaju se riječi: "konkursa, internih".

Član 17.

U članu 32a. u st. 1., 2. i 3. riječ "otvorenog" briše se.

U stavu 2. tačka a) riječi: "stava 2. člana 20. i stava 2. člana 21." zamjenjuju se riječima: "člana. 20. stav 2, člana 21. st. 2., 3. i 4. i čl. 26. i 27.".

Tačka c) mijenja se i glasi:

"c) Komisija za izbor imenuje se u skladu s članom 24. ovog zakona".

U tački e) riječi: "premještaju ili" brišu se.

Član 18.

Iza člana 32a. dodaje se novi član 32b. koji glasi:

"Član 32b.

Direktno preuzimanje državnih službenika

1. Državni službenik koji ima taj status u skladu sa zakonima Federacije Bosne i Hercegovine ili Republike Srpske i koji ispunjava opće uslove propisane ovim zakonom i posebne akademske i profesionalne uslove za radno mjesto koje se popunjava, može se bez oglašavanja, odnosno konkursa po bilo kojem osnovu, preuzeti u instituciju Bosne i Hercegovine.

2. Državni službenik može se direktno preuzeti isključivo na slično radno mjesto. Agencija pravilnikom propisuje koja radna mjesta se smatraju sličnim, vodeći računa o odredbama ovog zakona i entitetskih zakona, kojima se uređuje materija kojom se definiraju statusna pitanja državnih službenika.

3. O direktnom preuzimanju državnog službenika sklapa se sporazum između institucije BiH u koju se državni službenik preuzima i entitetskog organa državne službe, odnosno uprave iz kojeg se državni službenik preuzima, uz prethodno pribavljenu saglasnost državnog službenika. Na sporazum daju saglasnost Agencija i nadležna agencija entiteta, nakon što utvrde da državni službenik ispunjava propisane uslove za preuzimanje.